


# Nodyn Briffio

## Colli ein cynefinoedd i newid hinsawdd



**Friends of the Earth Cymru**

**Cyfeillion y Ddaear Cymru**

Mae proffil mawreddog yr Wyddfa wedi ei wisgo yn eira'r gaeaf yn eicon Cymreig. Mae'n hyfryd o dawel a di-newid, ac yn denu miloedd o dwristiaid bob blwyddyn i galon Cymru. Mae pob un o enwogion y byd dringo wedi bod yno i dalu gwrogaeth - Tenzing Norgay, Syr Edmund Hillary, Syr Chris Bonington, Chris Brasher, a Syr Roger Bannister. Ond mewn ychydig flynyddoedd, gallai'r eira a'r rhew a wnaeth yr Wyddfa yn faes ymarfer ar gyfer yr Himalayas gael ei golli. Dengys yr ymchwil diweddaraf o Brifysgol Bangor enciliad cyson yn llinell eira'r Wyddfa. Gallai lili'r Wyddfa a phlanhigion alpaidd eraill sy'n dibynnu ar yr oerfel hefyd gael eu colli wrth i'r patrymau tywydd newid o ganlyniad i newid hinsawdd.

### Beth yw newid hinsawdd?

Mae'r prif wyddonwyr yn cytuno bod newid hinsawdd yn rhywbeth gwirioneddol, a'i fod yn digwydd. Mae'r byd yn mynd yn gynhesach ac mae'r tywydd yn mynd yn fwy eithafol. Mae rhagor o sychder, stormydd a llifogydd ar eu ffordd. Mae'n ganlyniad uniongyrchol llosgi mwy a mwy o danwyddau ffosil ar gyfer defnydd cynyddol o ynni. Mae'r carbon deuocsid (CO<sub>2</sub>) sy'n cael ei ryddhau yn cadw gwres yr Haul yn yr atmosffer gan achosi effaith tŷ gwydr. Mae lefelau CO<sub>2</sub> heddiw draean yn uwch nag yr oeddent cyn y chwyldro diwydiannol.

### Beth sy'n digwydd i'r tywydd?

Ym Mhrydain, er enghraifft, mae nifer y stormydd gaeafol wedi dyblu dros y 50 mlynedd diwethaf. Mae cwmnïau yswiriant yn dweud y cynyddodd cost economaidd byd-eang trychinebau cysylltiedig â'r tywydd ddengplyg rhwng y 1950au a'r 1990au. Mae Sefydliad lechyd y Byd yn amcangyfrif bod tua 150,000 o bobl yn marw bob blwyddyn o ganlyniad i'r newidiadau hinsawdd hyn.

Yn ôl y tueddiadau presennol, mae'n edrych fel y bydd y patrwm hwn o dywydd ansefydlog yn datblygu ar gyfradd gyflymach fyth. Yng Nghymru, erbyn 2080, disgwylwn weld gaeafau gwlypach/cynhesach a hafau poethach/sychach; stormydd amlach a chryfach gyda glawiad dwysach, a lefel y môr i godi hyd at 80cm. Gallai hyn gael effaith sylweddol ar rai ardaloedd arfordirol ac isel ac ar weithgareddau economaidd pwysig megis twristiaeth, amaethyddiaeth a choedwigaeth.

---

**Mae Cyfeillion y Ddaear Cymru yn ysbrydoli atebion i broblemau amgylcheddol, sy'n gwneud bywyd yn well i bobl**

#### Cyfeillion y Ddaear Cymru:

- yn ymroddedig i ddiogelu'r amgylchedd a hyrwyddo dyfodol cynaliadwy ar gyfer Cymru
- yn rhan o fudiad ymgyrchu amgylcheddol mwyaf dylanwadol y DG
- yn rhan o'r rhwydwaith amgylcheddol mwyaf eang yn y byd, gyda dros 60 o fudiadau cenedlaethol ar draws pum cyfandir
- yn cefnogi rhwydwaith unigryw o grwpiau lleol sy'n ymgyrchu mewn cymunedau ledled Cymru
- yn dibynnu ar unigolion am dros 90% o'i incwm

I ymuno neu wneud cyfraniad, ffoniwch ni ar 0800 581 051

**Cyfeillion y Ddaear Cymru, 33 Oriol Arcêd y Castell, Caerdydd, CF10 1BY**

**Ffôn 029 2022 9577 Ffacs 029 2022 8775 Ebst cymru@foe.co.uk Gwefan www.cyddcymru.co.uk**

Mae byd cynhesach yn bygwth pobl a chynefinoedd. Awgrymodd astudiaeth ddiweddar yn Nature y gallai chwarter o anifeiliaid a phlanhigion y tir, 1 miliwn o rywogaethau i gyd, fod wei diflannu erbyn canol y ganrif.

### **Colli ein cynefinoedd**

Bydd codiad yn lefel y môr, a achosir gan iâ tawdd a dŵr cynhesach ac ehangach, yn arwain at lifogydd mewn ardaloedd isel. Gallai aberoedd a chorsydd ger y môr ddiflannu. Gallai adar megis y pibydd coesgoch golli eu cynefin bridio; gwelltiroedd gwlyb mewndirol a morfeydd heli arfordirol. Gallai manau fel aberoedd yr afon Dyfrdwy a'r afon Hafren golli ardaloedd, oherwydd codiad yn lefel y môr, y mae adar hirgoes ac adar eraill y glannau eu hangen i fwydo.

Erbyn canol y ganrif gallai rhostiroedd grugog a choetir ddioddef effeithiau andwyol. Bydd fforestydd naturiol yng Nghymru yn dioddef os bydd sychderau yn dod yn bethau mwy aml. Bydd coed fel y dderwen a'r onnen yn ei chael hi'n anodd i oroesi, tra y bydd conwydd yn ei chael hi'n haws. Bydd cyforgorsydd iseldir, tir gwlyb prin sy'n gartrefi i'r gwyfynod sydd hyd yn oed yn brinnach, yn sychu yn ystod hafau poeth. Bydd ucheldiroedd hefyd yn dioddef. Effeithir ar ansawdd dŵr mewn llynnoedd ac afonydd gan yr hafau hirach a chynhesach, gan ganiatáu i flymau algaid ffynnu ar draul pysgod ac adar.

### **Beth fydd yn digwydd i'r arth wen?**

Mae nifer o rywogaethau o blanhigion ac anifeiliaid yn annhebygol o oroesi newid hinsawdd. Ar gyfer rhai o'r rhywogaethau hyn ni fydd unman addas i fyw mwyach. Bydd eraill yn methu cyrraedd manau ble mae'r hinsawdd yn addas. Mae eirth gwyn yn yr Arctig eisoes yn ei chael hi'n anodd gan fod prinder iâ ar y môr yn y gaeaf yn golygu bod yr amser sydd ganddynt i hela a bwyta morloi yn llawer byrrach. Mae planhigion yn blodeuo, cyrhaeddiad adar mudo, y tymor bridio ar gyfer yr adar ac ymddangosiad pryfetach eisoes yn edrych fel petaent yn digwydd ynghynt yma yn y DU. Mae arolwg sy'n cynnwys 65,000 o fywyd gwyllt a welwyd yn awgrymu bod y llyffantod a'r cacwn ymhlith y rhai yr effeithir galetaf arnynt gan y tymhorau anrhagweladwy.

Mae eirlysiau a chennin pedr yn blodeuo yn gynharach, mae'r deri yn deilio'n gynharach ac mae gloŷnnod byw megis glas y celyn yn ymddangos yn gynharach, wrth i'r gwanwyn ddechrau'n gynt a'r hydref ddechrau'n hwyrach.

### **Mae ffermio dan fygythiad**

Bydd gaeafau mwynach yn caniatáu i blâu a bacteria eraill i oroesi, gan effeithio ar gnydau a bywyd gwyllt. Bydd priddoedd tenau yn sychu ac yn erydu yn yr haf. Bydd fflachlifau yn achosi mwy o bridd i gael ei olchi i lawr yr afon. Bydd newid cyflym mewn patrymau tywydd hefyd yn amharu ar batrymau tyfu. Ar draws y byd bydd methiant crydau a newyn yn beryglon gwirioneddol iawn mewn ardaloedd ble y mae glaw eisoes yn brin, fel mewn rhannau o Affrica a China.

### **Beth ellir ei wneud am y peth?**

Mae llawer y gellid ei wneud i rwystro a gwrth-droi'r cynnydd mewn allyriad y nwyon sy'n newid yr hinsawdd. Rhaid rhoi llawer mwy o bwyslais ar fesurau arbed ynni, systemau ynni adnewyddadwy (megis gwynt, solar a phŵer llanw) a systemau cludiant cyhoeddus da. Mae gan y system gynllunio rôl i'w chwarae mewn sicrhau bod newid hinsawdd yn cael sylw drwy, er enghraifft, sicrhau fod pobl yn gallu gweithio, siopa a mwynhau cyfleusterau hamdden yn agos i'w cartrefi - gan leihau'r angen am deithio gormodol.

### **Ymunwch â'r Her Fawr**

Mae ymgyrch Yr Her Fawr Cyfeillion y Ddaear yn helpu pobl sy'n poeni am newid hinsawdd i bwysu ar eu Haelodau Seneddol i basio deddf sy'n gorfodi Llywodraeth y DU i wneud toriadau blynyddol o 3 y cant mewn allyriadau CO<sub>2</sub> blwyddyn ar ôl blwyddyn.

- Mae angen i Lywodraeth y DU weithredu yn awr i leihau allyriadau carbon deuocsid - o gynhyrchiad trydan, o gludiant ac o ddiwydiant. *Ymunwch ag ymgyrch newid hinsawdd Yr Her Fawr i ofyn i'r llywodraeth ddechrau gweithredu ar newid hinsawdd.*
- Gallwch hefyd weithredu yn eich cartref neu'ch swyddfa drwy arbed ynni a chefnogi mentrau ynni adnewyddadwy, osgoi teithiau awyr a cheir diangen a phrynu'n lleol. *Am ragor o wybodaeth*

ewch i'n gwefan yn [www.foecymru.co.uk](http://www.foecymru.co.uk).

- Mae rhwydwaith Ffenoleg y DU yn cynnal Calendr Natur, gyda dros 12,000 o bobl yn y DU yn helpu i gofnodi newidiadau mewn nature. *Rhagor o wybodaeth ynglŷn â chymryd rhan gan [www.phenology.org.uk](http://www.phenology.org.uk)*



The climate is changing it's time to ask questions  
Mae'r hinsawdd yn newid, mae'n bryd ofyn cwestiynau